

## Rathaussturm Rede BM König am 27.02.2025

Ja, 2025 schreiben wir dieses Jahr,  
Und schon wieder senn ihr „Hexen“ da,  
wollt mi aus meinem schönen Rathaus treiba,  
ihr kennat mir so langsam au gestohlen bleiba.

Was hilft mein Kлага, was hilfts mich zum wehra,  
wenn ihr heut dean des Rathaus auskehra,  
Aber glaubt mir, auch em Rathaus ischs net emmer  
schee,

Das werdet ihr in de kommende Däg no säh.

So solls jetzt sai, i gäb mi geschlagen,  
Ihr könnt nun regieren in den nächsten Tagen.  
Den Rathaus-Schlüssel wellat ihr au no haba,  
doch vorher hab I no was zum saga.

Bevor Ihr nun startet mir Eurer Hexerei,  
hoff i, ihr henn au eure Zauberbesa dabei.  
Die Zauberbesa braucha mir jetzt emmer mehr,  
denn die Gemeindekasse ist seit Sommer fatzaleer.

Bitte füllt mir nach altem Hexenbrauch,  
heit no onsre leere Kassa bis auf.  
Koine Münza sollat nai,  
füllet auf nur mit große Schei.

Geht mit eurem Hexenbesen durch die  
Gemeindestuben,  
und fegt sie aus die Buda,  
Doch vergessat net - nur mit fegen und auch brüllen  
kann man Bürgers Wünsche nicht erfüllen..

**Jetzt zaubert mir die Kassa voll,  
damit i weiß, wie i des alles zahla soll.  
Jetzt gäbat mir schon all euer Geld,  
sonsch ischs um Eschach bald schlecht bestellt.**

**Die Feuerwehr will a neues Auto haba,  
dr Tennisverein seine Tennisplätz verlagra,  
an dr Schul müssen wir dringend a Nottreppe bauh,  
ond für unsere Firmen no noch neue Grundstückla  
schaua.**

**Weil die Gwerbsteuer wegbrocha isch, geht's uns  
grad so schlecht,  
do henn mir nix dafür kenne, des senn die  
Schlupflöcher im deutschen Steuerrecht,  
wenns do an Firmenchef mol richtig juckt,  
wird die Gwerbsteuer oifach en ra andra Gmoid  
ausgspuckt.**

**Do kosch als Gmoid au net viel macha,  
außer Spara bei de deure Sacha,  
au Steuererhöhungen bleibat do net aus,  
sonschd gohts uns s'Geld tatsächlich aus.**

**Für an Schultes isch des koi scheena Zeit,  
wo eh scho alles teurer gworra isch für d'Leit,  
viele Schlaflose Nächte liegen hinter mir,  
wo krieg i bloß an Goldesel her.**

**So an Goldesel den gibt's ja bloß bei de Gebrüder  
Grimm,  
doch i sott oin haba, sonst wird's schlimm,  
sonsch muss i doch glatt no mei Rothaus vermieten,  
ond my geliebtes E-Bike zum Verkauf obieta.**

**Mir Eschacher dean net dr Kopf en dr Sand naistegga,  
mir dean mutig noch vorna bligga,  
zuerscht verkaufa mir alle Bauplätz im Tann  
und dann gangat mir an dr Gmoidswald ran.**

**Mir dean jetzt oifach alle Bäum umhauen  
Und an dieser Stelle 50 Wendräder bauen  
Denn mit Windkraft duat mr richtig Geld verdienen  
Und so den Eschacher Haushalt sanieren.**

**Aber net nur in Eschach läuft grad net guad,  
Onser Landrat mir schon au Loid duat,  
er soll 60 Milliona bei de Krankahäuser spara  
und scho kommat alle Leut in Schara.**

**Ob Mutlanga, Oala oder Ellwanga,  
alle wellat jetztat Händel ofanga,  
mir brauchat alle 3 Krankenhäuser im Ostalbkreise,  
schempfat alle 3 betroffene Schutlheiße.**

**Doch dr Kreisrat isch net dumm,  
die bauat jetzt en Essinga a Zentralklinikum,  
ganz healinga ond bei Nacht,  
hot mr des Grundstückle klar gemacht.**

**Dass des Grundstückle net alle Vorgaba entspricht,  
des isch ja scho a saubleda Gschicht,  
denn die Wasserleitunga senn des Problem,  
ond die Statik auf am Boda aus Lehm.**

**Aber was net basst wird bassend gmacht,  
ond mir henn im Ostalbkreis no alles gschafft,  
ond deswäga wird des Spital gebaut mit 500 Bedda  
Denn mir kennat alles, außer Hochdeutsch nedda.**

**Wenig Geld kennt mr en Obergreaninga scho lang,  
aber au do nimmt des Läba seinen Gang,  
der Anbau vom Feuerwehrhaus wird grad baut  
ond au noch em alda Rathaus wird nun gschaut.**

**Des alte Haus in der Mitte von onserm Flegga,  
duat ja jeden der vorbeiläuft mächtig erschregga,  
am liebsten würden wir es schnell abreißen  
doch leider duad sich dr Denkmalschutz do drenn  
verbeißen.**

**Deswäga dean mir des Haus bei Immoscout einstellla  
Ond hoffentlich duats koiner wella,  
denn dann schieba mir des Gemäuer übern Haufa,  
ond henn endlich an Festplatz zum feira ond saufa.**

**Zum Schultes hab i mi letztes Johr in Obergreaninga  
wieder aufstellla lassa,  
am Wahltag konnt i`s dann gar net fassa,  
wiedergewählt henn mi die Obergreaninger mit 90%,  
wer hät des denkt.**

**⇒ Pause**

**So du Deifel ond Ihr Hexa,  
mir dean jetzt nemme weiter schwätza,  
ihr wolldat obedengt die Macht en Eschach haba,  
do hosch dr Rothausschlüssel ond machat jo koin  
Schada.**

**Ihr henn jetzt euer Aufgab ond I halt mei Maul,  
i gang mit euch jetzt mit ond ben richtig faul,  
werd drenga bis mur duat dr Schädel weh,  
darauf ein dreifach kräftiges Klammhogahexa O - E**